



Imarsiortunut atorfinitsitaanermi atugassarititaasut il.il. pillugit inatsisip Kalaallit Nunaannut atulersinneqarnissaa pillugu peqqussut aamma Imarsiorterup isumannaatsuunissaa pillugu inatsisip allanngortinneqarnera pillugu inatsisip assigiinngitsut Kalaallit Nunaannut atuutilersinneqarnerat pillugu peqqussut Namminersorlutik Oqartussat akuerissagaat pillugu Inatsisartut aalajangiiffigisassaattut siunnersuut

(Ineqarnermut, Attaveqaatersuutitut, Isorliunerusunullu Naalakkersuisoq)

(Siullermeerneqarnera)

Qujanaq Naalakkersuisut siunnersuutaannut, Demokraatiniit tapersikkatsinnut.

Tamanna alloriarneruvoq pingaarutilik maani nunatsinni imarsiortut aalisartullu sulineranni atugassarititaasut toqqissisimanerusumik, naapertuilluarnerusumik ullutsinnullu tulluunnerusumik pilersinnissaannut. Taakku inuit, immami suliffeqartut, nunatsinni inuussutissarsiummi ilungersunarnerpaami navianarnerpaasinnaasumilu suliarfik ingerlattarpaat. Taakkununga tulluarpog, uagut inuiaqatigiittut pisinnaatitaaffiiniq qulakkeerinnissasugut illersorlugillu, naalagaaffeqatigiinnermi allanit ilisimasatsit.

Siunnersuut kinguneqassaaq, imarsiortortagut aalisartortagullu siunissami umiarsuarmi danskisut erfalasulinni suleqatimittulli tunngaviusumik piginnaatitaaffeqalernerannik. Soorlu ilaatigut allaganngorlugu atorfinitsitaanermut isumaqatigiissuteqarnissamik piginnaatitaaffeqarnek, angerlamut angalanermut atatillugu toqqissisimaneq, napparsimanermi nakorsamit ikiorneqarnissamut periarfissaqarnek aammalu inuunermut tunngasunik immikkoorluinnartunut soorlu naartunermi illersorneqarnissamut. Tamarmik pitsanngorsaattissat, immami sulinermi isumannaallisaanermut ataqqinninnermullu annertusaataasussat.

Nuannerpoq, inatsisip aammattaaq Imarsiorterup Qullersaqarfik periarfissillugu nunatsinni immami angalanermi malittaarisassat malinneqarnerisut nakkutilliinissaanik periarfissimmagu. Taamaaliorterup, malittarisassat kinguneqarnerannik tatiginninneq annertusassavaat, aammalu atorfeqartut piomasagaataasutut pisinnaatitaaffeqalissallutik. Immami sulinermi atukkat pitsaasut isumannaatsullu pisinnaatitaaffinnik aallaaveqaannangillat. Aammali inuunermik peqqissutsimullu apeqqaasorujussuullutik.

Demokraatillu aamma iluaraat, siunnersuut pisortanut aningaasatigut kingunerlutsitsissanngimmat, aammali tassunga ilutigalugu umiarsuaatileqatigiinnut ersarissumik piomasagaatitaqarluni atorfinitsitsinermi ullutsinnut tulluuttunik ingerlatsinissaannut. Ingasattajaarnerunngilaq, inuit umiarsuit ingerlannerinut akisussaasuusut, aamma pitsaasunik atugaqarnissaat qulakkeerniarlugu, taakkununga ulluinnarni umiarsuarmi inuunermik pitsaasumik ingerlatsisussanut.



Paasisinnaavarput, umiarsuaatileqatigiiffiit ilaannut piumasaqaatit nutaat eqqunnerinut aningaasartuutitaqarsinnaasoq, toqqissisimanermilli, pitsaassutsumik siunissamullu qulakkeerinninnermik kinguneqartussaalluni. Inuussutissarsiut pitsaasumik ingerlasoq inuussutissarsiutaavoq, sulisussanit soqutigineqartoq, tatiginninnermik pilersitsisoq tamaallu isigalugu imarsionermik nukittorsaasoq.

Tamaat eqqarsaatigissagaanni aalisartunut umiartortunullu siuarsaataasussaavoq taamatullu inuussutissarsiummut pingaaruteqartumut, nunatta aningaasaqarneranik kulturianillu annertuumik nammataqartumut.

Demokraatit taamaattumik siunnersuut taparserpaat qilanaaralugulu, siunissami ullutsinnut tulluuttunik malittarisassaqaalissammat, tamanut, immami sulisuusunut, toqqissisimasumik, pisinnaatitaaffeqarlutik ataqqineqarlutillu sulinissaat qulakkeerniarlugu.

Taamatut oqaaseqaateqarluta siunnersuut akuereqqullugu innersuussutigaarput ataatsimiititaliamullu susassaqtumut suliareqqitassanngorlugu.